

Une convenzion cu l'ateneu di Novi Sad
pe colaborazion tal setôr viti vinicul

Viticulture cence confins

Al va indevant cul impegn de
Universitât dal Friûl sul front de
internazionalizazion. Il retôr
Alberto Felice De Toni al à
sotscriet in Serbie, ae
universitât di Novi Sad, un
acuardi di colaborazion
didatiche internazional intal
setôr de viticulture e de
enologjie.

La convenzion e je stade
firmade di Miroslav Veskovic,
retôr de universitât di Novi Sad
e Milan Popovic, preside de
facoltât di Agriculture. Pal
ateneu furlan a jerin presints
ancje i professôrs Roberto
Zironi, president dal cors di
lauree in Viticulture e enologjie
e Enrico Peterlunger, president
dal cors di lauree magjistrâl in
Viticulture, enologjie e marcjâts
vitivinicui.

"Al è un timp par ogni rôbe e
chest al è
chel de
colaborazion"
al à dit De
Toni,
sotlineant
ancje la
impurtance
de
partecipazion
ae mission
de Region Friûl - VJ cu la
presince dal president dal
Consei regionâl, Franco Iacop
e di Andrea Cecchini, referent
dai progjets Agrowine e
Innowine di Informest.

"La Region - al à sclarît
Iacop - aromai di 10 agns e à
firmât un protocol di intese cu
la provincie autonome de
Voivodine e e colabore in
diviers cjamps cun progjets
specifics intal setôr de sanitât,
de informatiche, des piçulis
mediis impresis, de culture cu
la Fondazion Aquilee su
evidencis romanis e de
agriculture cui progjets
Innowine e Agrowine intal
setôr de vit e dal vin. Cun
grande sodisfazion cumò o lin
a concretizâ cu la Universitât
dal Friûl un altri disvilup di
chest percors".

Fin dal acuardi, di durade
trienâl ma rinovabil, al è chel di
facilitâ e miorâ la cooperazion
academiche intai setôrs de
didatiche, de ricercje, de
formazion universitarie e
postlauree, di là dal scambi di
students, dottorants e
ricercjadôrs par studis, ricercjis
e pe realizazion di curvignis e

seminaris a nivel internazional.

Lis dôs universitâts a
podaran favori il scambi
culturâl e la cooperazion,
l'acès aes bibliotechis
universitariis e la condision di
contats cun altris istituzions
culturâls dai lôr pais.

La Universitât dal Friûl, cun di
plui, e metarà a disposizion la
sô esperience par supuartâ la
nassite di un cors trienâl in
Viticulture inte facoltât di
Agriculture dal ateneu di Novi
Sad, colaborant cu la
organizazion dal program di
studi e cu la formazion dal
personâl docent, in plui che
cul coinvolziment diret intal
insegnament dilunc dai prins
agns di atuazion dal cors.
L'obietif futûr al è chel di fâ
doplis titui academics tra lis
dôs universitâts intal setôr

vitivinicul.

Il cors di
studis in
Viticulture e
enologjie de
Universitât
dal Friûl al à
disvilupât di
fat une
grande
conotazion



internazional. Inviât intal 1993
secondant la vocazion
vitivinicule regionâl, il cors ur
furnis ai students un
completament de formazion
cu la esperience in altris Pais
in graciis de pussibilitât dal
dopli ricognossiment dal titul di
lauree cu la Gjermanie, la
Argentine e il Brasil, po dopo
aes convenzions cu lis
universitâts di Geisenheim,
Mendoza e Bento Gonçalves.

La struture didatiche dal
cors e je elaborade su la
fonde des liniis vuide
proponudis de Organisation
Internationale de la Vigne et
du Vin (Oiv, Paris). "In chescj
vincj agns - a sotlinein
Peterlunger e Zironi - si son
laureâts a Udin plui di 500
enolics che a operin in dutis lis
regions talianis e tal forest. La
grande articolazion didatiche
di chescj cors di lauree e la
analisi dal colocament
professionâl dai laureâts a
contribuissin a rinforçâ il rûl
che il Friûl - VJ al fâs inte
formazion di laureâts dedicâts
al setôr de produzion di vin
intal panorame de viticulture
taliane e mondial"